

BOSNA I HERCEGOVINA
FEDERACIJA BOSNE I HERCEGOVINE
SREDNJOBOSANSKI KANTON
OPĆINSKI SUD U JAJCU
Broj: 128 0 K 043883 24 K
Jajce, 06.01.2025. godine

Presudom Kantonalnog suda u Novom Travniku, broj: 128 0 K 043883 25 Kž od 28.05.2025. godine, preinačava se presuda Općinskog suda u Jajcu, broj: 128 0 K 043883 24 K od 06.01.2025. godine u kazneno pravnoj sankciji tako da se za radnje za koje je tom presudom optuženi D. R. oglašen krivim za kazneno djelo "Napad na službenu osobu u vršenju poslova sigurnosti" optuženom utvrđuje kazna zatvora u trajanju od 8 (osam) mjeseci dok se istodobno uzima utvrđenom za kazneno djelo "Lažno prijavljivanje, kazna zatvora u trajanju od 2 (dva) mjeseca, pa sud optuženog D. R. osuđuje na jedinstvenu kaznu zatvora u trajanju od 9 (devet) mjeseci.
U ostalom dijelu ta presuda ostaje neizmijenjena.

U IME FEDERACIJE BOSNE I HERCEGOVINE

Općinski sud u Jajcu, sudija Alem Ribić, uz sudjelovanje Esme Ganibegović kao zapisničara, u krivičnom predmetu protiv optuženog D. R., sina M., radi izvršenja krivičnog djela, „Lažno prijavljivanje” iz čl. 347. stav 3. Krivičnog zakona FBiH (u daljem tekstu KZ F BiH), u sticaju sa krivičnim djelom "Napad na službenu osobu u vršenju poslova sigurnosti" iz člana 359 stav 1. KZ F BiH, a sve u vezi sa članom 54. KZ F BiH, po optužnici Kantonalnog tužilaštva Travnik broj: T06 0 KT 0035188 24 od 04.07.2024. godine, nakon održanog pretresa za razmatranje izjave o priznanju krivnje i pretresa za izricanje krivično – pravne sankcije od 18.12.2024.godine, u prisustvu optuženog D. R. i kantonalnog tužioca Frane Marjanovića, dana 20.12.2024. godine donio je i javno objavio, a u pismenom otporku donosi dana 06.01.2025.godine slijedeću:

P R E S U D U

Optuženi:

D. R., sin M. i majke J. rođene Č., rođen ... godine u J., nastanjen na adresi ... općina J., JMBG: ..., po nacionalnosti ..., državljanin ..., pismen sa završenom Srednjom strukovnom školom, po zanimanju bravar-varioc, nezaposlen, razveden, otac jednog djeteta, nije služio vojsku i ne vodi se u vojnoj evidenciji, osuđivan i to:

- Presudom Općinskog suda Bugojno broj 46 0 K 031114 11 K od 27.02.2012.godine, k.d. Oštećenje tuđe stvari iz člana 239/1 u vezi sa članom 31. KZ F BiH, novčana kazna u iznosu od 500,00KM, brisana osuda
- Presudom Općinskog suda Jajce broj 128 0 K 0172129 15 Kps od 11.08.2015.godine, k.d.Nasilje u porodici iz člana 222/2 KZ F BiH, uslovna osuda kazna zatvora u trajanju od 6 mjeseci na 1 godinu, brisana osuda
- Presudom Općinskog suda Jajce broj 128 0 K 037028 22 Kps od 17.12.2022.godine, k.d. Laka tjelesna povreda iz člana 173/1 KZ F BiH, uslovna osuda kazna zatvora u trajanju od 6 mjeseci na 1 godinu.

K R I V J E

Što je:

Dana 18.03.2024.godine oko 19,10 sati u mjestu Carevo Polje, općina Jajce, ispred porodične kuće njegovog oca M. R., i u prisustvu istog, nakon što se doveo u alkoholizirano stanje od 3,49 promila alkohola u krvi, upućujući verbalne uvrede policijskim službenicima PS Jajce E. K i E. T. koji su obavljali poslove javne sigurnosti, odnosno postupali po prethodnoj prijavi D. R. koji je istog dana, u navedenom vremenskom intervalu u PS Jajce svjestan radnji koje poduzima te da događaj o kome izvještava policiju se nije desio, pa i pored toga i htijući to, lažno prijavio da je ubio svog oca i da policija dođe po njega, da bi potom po dolasku patrole policije, iako svjestan radnji koje poduzima i da iste kod drugoga mogu stvoriti osjećaj straha i ugroženosti i htijući to, fizički napao policijske službenike na način da je zatvorenim pesnicom udario u predjelu stomaka policijskog službenika PS Jajce oštećenog E. K., uslijed čega je isti zadobio tjelesnu povredu u vidu bolnosti mjesta na koje je zadobio udarac, te prilikom stavljanja pod nadzor prijavljenog u predmetnom događaju, obzirom da se opirao policijskim službenicima prilikom poduzimanja službenih ovlaštenja-upotrebe sredstava za vezivanje, došlo i do tjelesne povrede u vidu bolnosti u predjelu petog prsta desne ruke policijskog službenika PS Jajce E. T.

Dakle, sam sebe prijavio da je počinio krivično djelo iako to nije učinio te napao policijske službenike u vršenju poslova javne sigurnosti.

Čime je počinio krivična djela „Lažno prijavljivanje“ iz člana 347. stav 3. KZ FBiH i krivično djelo „Napad na službenu osobu u vršenju poslova sigurnosti“ iz člana 359. stav 1. istoga Zakona, u vezi sa članom 54. stav 1. KZ FBiH, pa ga sud primjenom gore navedenih odredbi

O S U D U J E

Za krivično djelo „Lažno prijavljivanje“ iz člana 347. stav 3. KZ FBiH opisano u izreci ove presude na KAZNU ZATVORA U TRAJANJU OD 2 (DVA) MJESECA.

Za krivično djelo „Napad na službenu osobu u vršenju poslova sigurnosti“ iz člana 359. stav 1. istoga Zakona, u vezi sa članom 54. stav 1. KZ FBiH opisano u izreci ove presude na KAZNU ZATVORA U TRAJANJU OD 4 (ČETIRI) MJESECA.

Primjenom odredbi čl. 54 Krivičnog zakona FBiH optuženi se za gore počinjena navedena krivična djela „Lažno prijavljivanje“ iz člana 347. stav 3. KZ FBiH, u sticaju sa krivičnim djelom „Napad na službenu osobu u vršenju poslova sigurnosti“ iz člana 359. stav 1. istoga Zakona, u vezi sa članom 54. stav 1. KZ FBiH

O S U D U J E

NA JEDINSTVENU KAZNU ZATVORA U TRAJANJU OD 5 (PET) MJESECI.

Temeljem odredaba čl. 202 st.1 ZKP –a FBiH optuženi se obavezuje nadoknaditi troškove krivičnog postupka u iznosu od 200,00 KM (slovima : dvijestotine konvertibilnih maraka).

Obrazloženje

Aktom broj: T06 0 KT 0035188 24 od 04.07.2024. godine, Kantonalno tužilaštvo Travnik, podiglo je optužnicu protiv optuženog D. R. kojom se optuženom stavlja na teret da je počinio krivično djelo Lažno prijavljivanje“ iz člana 347. stav 3. KZ FBiH, u sticaju sa krivičnim djelom „Napad na službenu osobu u vršenju poslova sigurnosti“ iz člana 359. stav 1. istoga Zakona, u vezi sa članom 54. stav 1. KZ FBiH.

Navedena optužnica je od strane ovog suda potvrđena 12.09.2024. godine, te se optuženi D. R. na ročištu povodom izjašnjenja o krivnji po potvrđenoj optužnici izjasnio riječima „Kriv sam“ po potvrđenoj optužnici broj: T06 0 KT 0035188 24 od 04.07.2024. godine.

U datoj uvodnoj riječi pretresu za izricanje krivično – pravne sankcije od dana 18.12.2024. godine, a nakon pretresa za razmatranje izjave o priznavanju krivnje Kantonalni tužilac ostao je pri tvrdnji da je optuženi počinio krivična djela koja mu se podnesenom optužnicom stavlja na teret, a kako je optuženi priznao krivična djela koja mu se stavljaju na teret predlažu da sud istoga oglasi krivim sukladno zakonu a da prilikom odmjeravanja kazneno – pravne sankcije uzme u obzir sve okolnosti koje su od značaja za odmjeravanje i visinu kazne, sve u cilju ispunjavanja svrhe kažnjavanja.

Kod date izjave o priznanju krivice optuženi D. R. je ostao tokom cijelog provedenog postupka tj. kako u fazi izvođenja dokaza tako i u završnim riječima i izjavi da se kaje zbog tog djela, slaže se sa prijedlogom tužilaštva da se odluči na temelju stanja u spisu.

U provedenom dokaznom postupku izvedeni su dokazi tužilaštva kako slijedi: Informacija o prijavi PU Jajce broj 02/5-3-1-04-2-84/24 AR od 18.03.2024.godine, Službena zabilješka PS Jajce broj 02/5-3-04-9-2-199/24 od 18.03.2024.godine, Službena zabilješka PS Jajce broj 02/5-3-04-9-2-200/24 od 18.03.2024.godine, Službena zabilješka PU Jajce broj 02/5-2-04-9-2-OI-166/24 od 19.03.2024.godine, Patrolni nalog PS Jajce broj 1760/24 od 18.03.2024.godine , Zapisnik o alkotestiranju lica E. K. PU Jajce od 18.03.2024.godine, Zapisnik o alkotestiranju lica E. T. PU Jajce od 18.03.2024.godine , Nalaz i mišljenje JZU „Dom zdravlja“ Jajce na ime E. K. broj 2440 od 18.03.2024.godine, Prijava o povredi JZU „Dom zdravlja“ Jajce na ime E. K. broj 2440/24 od 18.03.2024.godine, Nalaz i mišljenje specijaliste JU Opća bolnica Jajce na ime E. K. od 18.03.2024.godine, Nalaz i mišljenje JZU „Dom zdravlja“ Jajce na ime E. T. broj 2441 od 18.03.2024.godine, Prijava o povredi JZU „Dom zdravlja“ Jajce na ime E. T. broj 2441/24 od 18.03.2024.godine, Nalaz i mišljenje specijaliste JU Opća bolnica Jajce na ime E. T. od 18.03.2024.godine, Zapisnik o ispitivanju alkotestom na ime D. R., PU Jajce , Zapisnik o lišenju slobode D. R., PU Jajce broj 06/24 od 18.03.2024.godine, Zapisnik o otpustu lica lišenog slobode D. R. PU Jajce broj 06/24 od 19.03.2024.godine, Izvod iz kaznene evidencije PS Jajce za D. R. broj 02/5-3-04-2-123/24 od 03.05.2024.godine.

Uz optužnicu su dostavljeni svi dokazi za koje je predloženo da se izvedu na glavnom pretresu, a navedeni su pod tačkama I, i II „Prijedloga dokaza koje treba izvesti“, te su dostavljeni I pročitani u dokaznom postupku i sljedeći dokazi: Zapisnik o saslušanju svjedoka E. K., PU Jajce broj 02/5-2-04-9-2-OI-163/24 od 19.03.2024.godine, Zapisnik o saslušanju svjedoka E. T., PU Jajce broj 02/5-2-04-9-2-OI-164/24 od 19.03.2024.godine, Zapisnik o saslušanju svjedoka M. R., PU Jajce broj 02/5-2-04-9-2-OI-223/24 od 07.05.2024.godine, Zapisnik o ispitivanju

osumnjičenog D. R., PU Jajce broj 02/5-2-04-9-4-OI-167/24 od 19.03.2024. godine, Nalaz i mišljenje sudsko-medicinskog vještačenja od 20.06.2024.godine, Troškovnik KT Travnik od 04.07.2024.godine.

Svi provedeni dokazi u skladu sa odredbom člana 296 Zakona o krivičnom postupku FBiH (u daljem tekstu: ZKP FBiH) cijenjeni su u svojoj cjelini, te svaki dokaz pojedinačno i u vezi sa ostalim dokazima, te je sud na osnovu izvedenih dokaza - materijalnih isprava zapisnika i službenih zabilježku u vršenju svojih ovlaštenja sačinjenih od strane PU Jajce, te nalaza i mišljenja medicinskih ustanova na području općine Jajce te sudsko – medicinskog vještačenja dr Markunovića došao do zaključka da je optuženi počinio krivična djela na način, mjesto i u vrijeme koja mu se potvrđenom optužnicom stavljaju na teret.

Sud konstatuje da je optuženi D. R. u toku cijelog postupka ostao kod date izjave o prihvatanju krivice za krivična djela koja mu se podnesenom optužnicom stavljaju na teret te da izvedeni dokazi u toku postupka pružaju dovoljno osnova za zaključak da je upravo optuženi počinio krivična djela na način kako je to navedeno u podnesenoj optužnici u pogledu mjesta, vremena i radnji izvršenja kojima je optuženi ostvario sva bitna obilježja opisnih krivičnih djela.

Članom 347 Krivičnog Zakona F BiH (Sl. novine F BiH 36/03, 21/04-Ispr 69/04, 18/05, 42/10, 42/11, 59/14, 76/14, 46/16, 75/17 i 31/23) propisano je krivično djelo „Lažno prijavljivanje“ pa tako u stavu 3 je propisano da : „ Ko sam sebe prijavi da je učinio krivično djelo propisano zakonom u Federaciji, iako ga nije učinio , kaznit će se novčanom kaznom ili kaznom zatvora do šest mjeseci „.

Članom 359 KZ FBiH propisano je krivično djelo koje nosi naziv „ Napad na službenu osobu u vršenju poslova sigurnosti“ te je u stavu 1. propisano je da „ko napadne ili ozbiljno prijeti da će napasti sudiju ili tužioca, ili službenu osobu ili osobu koja joj pomaže u vršenju poslova javne sigurnosti ili sigurnosti Federacije ili dužnosti čuvanja javnog reda kaznit će se kaznom zatvora od tri mjeseca do tri godine“.

Prilikom odlučivanja o vrsti i visini krivične sankcije, sud je cijenio sve okolnosti predviđene članom 49. KZ FBiH, te je od olakšavajućih okolnosti uzeo u obzir da je optuženi u ranijoj fazi postupka priznao krivicu čime je doprinio da se krivični postupak završi efikasno i ekonomično, dakle što brže, dok je od otežavajućih okolnosti sud je uzeo u obzir da je optuženi ranije osuđivan pravosnažno za više krivičnih djela od kojih mu je krivični sud u više navrata izricao novčane kazne i uvjetne osude (u dva navrata) a sve kako bi isti promijenio svoje ponašanje i prestao sa činjenjem krivičnih djela, te ovaj sud zaključuje da se izricanjem bezuvjetne kazne zatvora jedino postići svrha kažnjavanja i utjecati na buduće ponašanje optuženog.

Pored navedenog krivični sud je uzeo u obzir i način izvršenja krivičnih djela jer su oba krivična djela počinjena pod dejstvom alkohola gdje je krivično djelo iz člana 347. st.3 KZ FBiH u vezi sa stavom 1. istog člana počinio tako što je lažno prijavio da je ubio M. R. koji je otac optuženog, a krivično djelo iz člana 359 st. 1. KZ F BiH, počinio na način da je optuženi istim nanio tjelesne povrede policijskim službenicima E. K. i E. T., dakle napao policijske službenike u vršenju poslova javne sigurnosti.

S obzirom na navedeno, krivični sud je za krivično djelo „Lažno prijavljivanje“ iz člana 347. st.3 KZ FBiH izrekao kaznu zatvora u trajanju od 2 mjeseca, te za krivično djelo „Napad na službenu osobu u vršenju poslova sigurnosti “ iz člana 359 st. 1. KZ FBiH izrekao kaznu zatvora u trajanju od 4 mjeseca, te je primjenom odredbi člana 54. KZ FBiH za gore počinjena krivična djela u sticaju optuženog osudio na jedinstvenu kaznu zatvora u trajanju od pet (5) mjeseci.

Sud je na ime troškova krivičnog postupka optuženog D. R. obavezao da ovom sudu nadoknadi iznos od 200,00 KM (slovima : dvijestotine konvertibilnih maraka) uzimajući u obzir složenost i dužinu trajanja ovog postupka, te činjenicu da je u ovom postupku provedeno vještačenje po vještaku medicinske struke dr Branimiru Markunoviću, u roku od 30 dana od pravosnažnosti ove presude se u skladu sa članom 202. st. 1. ZKP-a FBiH.

S obzirom na sve izloženo, krivični sud je odlučio kao u izreci presude.

Zapisničar

Sudija

Esma Ganibegović

Alem Ribić

Pouka o pravnom lijeku:

Protiv ove presude može se izjaviti žalba Kantonalnom sudu u Novom Travniku preko ovog suda u roku od 15 dana od dana prijema presude. Žalba se podnosi u dovoljnom broju primjeraka za sud i protivnu stranku.